


's Heiserl am Roan....



1. I hab mei Heiserl am Roan,
Das Heiserl is sauba, nit kloan.
Doch all meine Zimmer,
Die g'frein mi jetzt nimmer,
Denn i bin im Heiserl alloan.
2. Die Vögerl, bald groß und bald kloan,
Die singen vorm Heiserl am Roan.
Das G'sangl tuat schallen,
Doch will's mir nicht g'fallen,
Denn ich hör nur d' Vögerl alloan.
3. Am Bergerl vorm Heiserl steht a Stoan,
Da sitz i und schneid meine Sp oan.
Die Aussicht is prächtig,
Da sieht ma weitmächtig,
Mi freit aba 's Schaun nit alloan.
4. Mei Betterl is stark und nit z' kloan,
I aba lieg drin' als wia a Stoan.
I walz mi halt uma,
Als hätt' i an Kumma,
Denn i lieg im Betterl alloan.
5. A Diandal hätt' da Wirt von da Gmoa,
Die wär für mi recht wia i moan.
Zum Weib hab i 's g'nomma,
Den vorigen Somma,
Seitdem bin i nimma alloan.
6. Es geht nimma recht wia i 's moan,
Mei Heiserl, das wird ma scho z'kloan,
Die Ruah is ausg'flog'n,
I hab mi betrog'n,
I wollt' i wär' wiedrum alloan.